

ante vos las dichas justiçias ó ante qualesquier de vos, nin en los dichos sus bienes e mercadorias contra razon e derecho, ca yo por la presente los tomo e reço en mi guarda e seguro e so mi anparo e defendimiento real, e mando e definido que ninguna nin algunas presonas nin vayan nin pasen contra el, so las penas en que cayen los que pasan e quebrantan seguro puesto por carta e madado de su rey e señor natural. E que vos las dichas justiçias lo fagades asy aprenogar publicamente por las plaças e mercados e otros lugares acostunbrados desas dichas çibdades e villas e lugares, por pregonero e ante escrivano publico, porque pueda venir a notiçia de todos e ningunos pueden pretender dello ynorançia; e fecho el dicho pregon, si alguna o algunas presonas fueren o pasaren contra ello, pasedes e proçedades contra las tales a las penas susodichas. E los unos nin los otros non fagades ende, por alguna, so pena de la mi merçed e de diz mill maravedis para la mi camara. E demas, mando al ome que vos esta mi carta mostrare que vos enplaze que parecades ante mi en la mi corte, doquier que yo sea, del dya que vos enplazare a quinze dias primeros siguientes, so la dicha pena, so la qual mando a qualquier escrivano publico que para esto fuere llamado que de, ende al que vos la mostrare, testimonio signado con su signo, porque yo sepa en como se cunple mi mandado.

Dada en la villa de Medina del Campo, catorze dyas de junio, año del nacimiento del nuestro Señor Jhesuchristo de mill e quatroçientos e sesenta e tres años.

Yo Garçia Ferrandez de Alcalá la fiz escrevir por mandado de nuestro señor el rey con acuerdo de los del su consejo. Andreas, liçençiatu. Iohannes de Barrosus, legum doctor. Alfonsus, doctor. Petrus, liçençiatu. E en las espaldas de la dicha carta avia dos nonbres que dezian: Registrada. Chançeller.

203

1463-VI-14, Medina del Campo.—Provisión real al asistente y alcaldes de la ciudad de Murcia, confirmando la vecindad de Juan de Rótulo, mercader milanés. (A.M.M., Cart. cit., fol. 155r-v.)

Don Enrique por la graçia de Dios rey de Castilla, de Leon, de Toledo, de Gallizia, de Sevilla, de Cordova, de Murçia, de Jaen, del Algarbe, de Algezira e de Gibraltar, e señor de Vizcaya e de Molina. Al mi asistente e alcaldes e otras justiçias qualesquier de la noble çibdad de Murçia e a cada uno de vos, salud e graçia.

Sepades que Juan Rotolo, mercador milanés, me fizo relaçon que el vino de fuera de mis regnos a vevir a esa dicha çibdad de Murçia, e que tomo aquella



vezindad e fue resçevido por vezino della por el conçejo e por vos el dicho asistente e alcaldes e por los regidores de la dicha çibdad, e que diera fianças para tener la dicha vezindad por el tiempo e segund que devia, e que non enbargante que asy fue tomado e avido e reçevido por vezino algunas presonas non le quieren aver por vezino de la dicha çibdad, nin le guardar las esençiones e otras cosas que se guardan e deven guardar a los otros estranjeros que son reçevidos por vezinos de la dicha çibdad, en caso que el tyene su casa poblada en ella, diziendo que non es casado, en lo qual diz que ha resçevido e reçeibe agravio e daño, e a mi diz que ha rescresçido deserviçio. E me suplico e pidio por merçed que le mandase proveer sobrello, mandandole guardar la dicha vezindad e las esençiones de que deve gozar como vezino de la dicha çibdad en caso que non sea casado, pues es vezino e tyene casa poblada en la dicha çibdad, e yo tovelo por bien.

Porque vos mando a todos e a cada uno de vos que veades lo susodicho, e sy asy es que el dicho Juan Rotolo es avezindado en esa dicha çibdad e resçevido por vezino della en la forma que deve e esta ordenado, le guardedes e fagades guardar la dicha vezindad e las esençiones e cosas que por razon della le deven ser guardadas, segund se guardan e deven ser guardadas a los otros vezinos della, e non consyntades que le sea fecho agravio nin syn razon alguna contra derecho. E non fagades ende al, por alguna manera, so pena de la mi merçed e de diez mill maravedis a cada uno para la mi camara. E demas, mando al ome que vos esta mi carta mostrare, que vos enplaze que parescades ante mi, del dia que vos la mostrare fasta quinze dias primeros siguientes, so la dicha pena a cada uno, so la qual mando a qualquier escrivano publico que para esto fuere llamado que de, ende al que vos la mostrare, testimonio sygnado con su sygno, porque yo sepa en como se cunple mi mandado.

Dada en la villa de Medina del Campo, catorze dias de junio, año del nascimiento del nuestro Señor Jhesuchristo de mill e quatroçientos e sesenta e tres años.

Yo Garçia Ferrandez de Alcalá la fiz escrivir por mandado de nuestro señor el rey, con acuerdo de los del su consejo. Andreas, liçençiatu. Johannes de Barrosus, legum doctor. Alfonsus, doctor. Petrus, liçençiatu. E en las espaldas de la dicha carta avia dos nonbres que dezian: Registrada. Chançeller.

